

## «Ma'rifat» gazetasi mehmonxonasi

*Ahmad A'zam – yozuvchi, «O'zbektelefilm» studiyasi bosh direktori bilan suhbat  
(2005 yil)*

### *1. Sizga dastlabki saboqni kim bergan? Birinchi ustozingizni eslab otsangiz.*

A.A.: Aslida har bir odamning ustozlari avvalo ota-ona. Farzand -nusxasi ota-onadan olingan bir kitob, faqat tabiat keyingi muhitga qarab ul-bul tahrir kiritadi, takomillashtiradi. Ilm harfini o'rgatgan ustozlarga kelsak, ular bolani taraqqiyotga o'rgatadi, ravnaq darsini beradi. Bilmadim, kimga qanday, lekin meni nuqul yaxshi o'qituvchilar o'qitgandek. Maktabda paytlarim men ham ularning hammasini birdek yaxshi korardim, desam, albatta yo'lgon, chunki hamma qatori o'yingaroq edim, birovni qulo'gimdan chozgan, boshqasi burchakka tur'gizib qoygan, masalan, direktorimiz roza oqshomi odamlarning darvozasi oldida ramazon aytganimiz uchun sherik joralarimni qoyib, meni katta tanaffusda, lineykada safning oldiga chiqarib, «Eshonning o'gli gadoychilik qildi», deb butun maktabga sazoyi ham qilgan, osha paytlari bunaqa jazolar tabiiyki, adolatsizlik tuyulgan, lekin hozir birorta ham o'qituvchimni o'grinib eslamayman. Ular meni ko'plashib ayab-tergab, shu bola sinib qolmasin deb, avaylab o'qitganga oxshaydi. Boshlang'ich tort sinf darsini bergan Xatira opamizning tatar shevasi sal-pal bilinadigan ovozi hali ham qulo'gimda. Hatto tanbeh berganda ham bolaning konglini sindirmaydigan mehribon kampir edi. «Sen o'zing yaxshi bolasan-ku, bu ish senga yarashmaydi, xopmi», desa, chindan ham yaxshi bola bo'lishga intilar edik. Umuman, odamning kimligi unga kimning nimani o'qitganiga juda bo'g'liq. O'qituvchi bergan saboqning ta'siri faqat maktabda paytimizda emas, butun umr bo'yi bilinib turadi. Chunki shaxsiyatning asosida dunyoni tushunish, tushunchalar orasida o'zinikini – o'zligini anglash, ya'ni bilim yotadi. Olgan bilimimizning sifati – navbatimizdan keyingilarga beradiganimiz mavqe-darajasi avvalboshda kimlarning qolida shaxsiyat tahsilini olganimizga juda-juda bo'g'liq. Maktab – jamoada yashash, ijtimoiy jamiyat tarbiyasini beradi, bunda, tabiiyki, o'qituvchi – eng asosiy kuch.

### *2. Maktabda qanday o'quvchi bo'lgansiz?*

A.A.: Uchinchi sinfgacha nima o'qiganimni bilmayman, shunga qaraganda, yomon o'qigan bolsam kerak. Keyin, esimda yo'q, o'zim kirdimmi, yo uyda kitob o'qish vazifa qilib berilganmide, kutubxonadan bitta kitob oldim. Lekin uyda o'qib chiqib, topshirishga kelganimda Nafisa opa degan kutubxonachimizning: «Qani, kitobda nima bo'lgan ekan», deb sorab qolgani, shu yerdagi uch-tortta kattaroq sinf bolalari oldida o'qiganimni gapirib berganim aniq esimda. Nafisa opa uncha ishonmay, kitobni qolimga tutqazib, «Ovozingni chiqarib o'qi-chi», dedi, men o'qib berdim, shunda opa haligi bolalarga qarab: «E-e, kordingizmi, xuddi radiodan gapirganday o'qidi, sizlar esa hali ham harf urishtirib yuribsizlar», dedi. Konglim to'g'dek ko'tarildi. Shu maqtov sababmi, doim kitob o'qiydigan bo'ldim. Koklamda Xatira opamiz «Nafisa aytdi, Ahmad qish bo'yi qirqta kitob o'qibdi», deb meni butun

sinfga ornak korsatdi. Shu-shu, kutubxonachi opamizning iliq gapi, o'qituvchimizning daldasi sabab badiiy kitob mutolaasi men uchun katta martabaga aylandi, ko'p o'qish o'z-ozidan peshqadam o'quvchilar safiga qatoriga chiqarib qoydi. Har qalay, o'qituvchilarimizning fidoyiligidan bo'lsa kerak, maktabimizda kimozarga yaxshi o'qish urf edi, shundandirki, G'azira degan cho'g'roq qishlo'g'imizning o'zidan, adashmasam, besh fan doktori, qirqdan oshiq fan nomzodi yetishib chiqqan. Rahbarlik va boshqa kasblarda il'gorlarning esa sano'gi yo'q...

*3. Sizlar maktabda o'qigan davrlarda darsliklar, darslar – hammasida shoro mafkurasi ta'sirida bo'lgan, shu haqdagi fikringiz...*

A.A.: Nafaqat ta'sirida, balki o'sha mafkuraning hukmi bosimi ostida o'qiganmiz. Qishloq joy, «bola bo'g'cha» nimaligini bilmay, paxtaning ichidan emaklab maktabga o'tganmiz, birinchi sabo'g'imiz shoro qo'rg'oni yulduzlari, dohiy boboga ba'g'ishlangan va albatta, sinfdan sinfga ko'chganimiz sari bilib-bilmay «siyosiy taqalanib» boraverganmiz. Lekin, ayni paytda har xil kitob o'qib, fikrlashga o'rganib, mushohada yuritganimiz sayin, har kuni peshanamizga uriladigan yakkahokim mafkura maktab peshtoqida oftobda unniqib ketgan alvon shiorga aylanib, ta'sirini yo'qotib boravergan. Aqlli o'quvchi «Mening ikki onam bor», deb «besh» olish uchun she'r yodlagani bilan, onasi bittaligini yodidan chiqarmagan, dohiy haykalchasi oldida qizil galstuk taqib navbatchi turgan payti, nimadan yasalgan o'zi deb, uni chertib-chertib ham ko'rgan. Aytsak-aytibmiz-da, tursaturibdi-da degan mazmunda. «Yol'gonga yo yalqov ishonar, yo – anqov» deganlaridek «aktivistu aktivistka»lar ham bo'lardi, asosiy ko'pchilik esa o'zini ergashgan korsatib, aslida o'z bilganidan qolmas edi. Boshqacha aytganda, yol'gonga asoslangan mafkura tabiiy ravishda o'ziga yol'gon munosabatni ham yaratgan, lekin shu bilan birga, «Ha-e, seniki juft desak, asakamiz ketibdimi», degan zaylda odamlarning ruhiyatida ichi sirtiga teskari bir loqaydlikni paydo qilgan edi. Inson o'zi, o'zligi, vatani, millati uchun nafaqat kurashishni, balki shu haqda oylashni befoyda, behuda bilib qolgan, oylaganiga o'zi ham ishonmas edi. Bu juda katta ijtimoiy illat edi, shuning uchun ham mustaqilligimizning ilk yillari ancha tahlakali kechdi. Ijtimoiy hayotga beparvolik tark etmagan kongillar hali borki, shundaylar yonida kechayotgan voqealarga hanuz beparvo qaraydilar.

*4. Lekin, aytyapsiz-ku, bitta qishloqdan shuncha olim yetishib chiqqan deb?*

A.A.: Yakkahokim mafkura eng avvalo avomni olomonlashtiradi, olomonning kuchi, olomonchilik bilan afkor ommani itoatga keltiradi, lekin xalqni butkul qul qila olmaydi, har qanday sharoitda ham fikri tushovlarga tushmaydigan odamlar bo'ladi, bular ziyolilar. Fikrni bemajol etish mumkin, lekin o'ldirib bo'lmaydi, fashizm yo kommunistik kabi totalitar mafkura mashinalari millionlarni qatag'on qilgani bilan doim yangidan kotarilgan ziyolilar qatlamlariga duch kelaverganini tarixdan bilasiz. Ustidan takror-takror yotqiziladigan asfaltni har yili qayta-qayta

yorib chiqadigan chayir giyohlar – shoro davrida yetishgan nafaqat haqiqiy olimlarga, balki osha davrlarda ichda bolsa-da, fikrlashdan toxtab qolmagan insonlarga ham bir timsol! Buning bir korinishi - ilmga intilish. Shuncha zulumatga, rejali qirg'inlarga qaramay, millatning millatligi, xalqning xalqligi saqlanib, erkka chiqqanimizdan keyin qayta gurkiraganimizni ham, meningcha, tafakkurning oq ildizlari shunday saqlanib qolgani bilan izohlash mumkin. Yana ham olimlar yaxshiroq bilar, qishloqimizda besh yuz yil avvallar Movarounnahr piri bo'lgan Hazrat Azizon Shayx Xudoydodi Valiyning qadamjosi bor, u zotning ulkan ulamo, tariqat peshvosi, katta shoir ekani shu yetti-sakkiz yil ichida ma'lum boldi, shoro payti «Valibobo» degan otlariyu xaroba marqadi, o'git omboriga aylangan bir xonaqohidan boshqa hech bir narsa ma'lum emas, lekin gapirganda, ziyoratga kelganda juda katta haybati bor edi, kongillarga bir mahobat solar edi. «Samaruya» kitobida shu tabarruk zotning qabridan nur chiqib turishi aytilgan, balki qishloqimizdan olim ko'pligi shunday buyuk ajdodimizning ibrat namunasi kelayotgandir. Yana ham bilmadim, yurtimizning o'zi shunday nurli, ulug'lari ham juda kop otgan.

*5. Shoro davri adabiyotini ham shunday aytish mumkinmi, har holda yuzlab kitoblar yuz minglab nusxalarda bosilgan...*

A.A.: Bu haqda bilaman – gapiraman deyishga fikrim ojizlik qiladi, chunki nihoyatda murakkab muammo. Shoro adabiyoti deganimiz fikrni qantarib qo'yan, ipakdan ham mayin, lekin polatsimdan ham pishiq korinmas iplardan chiyratma toqilgan tuzoq, badiiy mushohadani uzun arqonlagandir, ammo albatta kalta tushovlab olgan edi. U qorqinchli mahobati bilan birga mudhish bir gozalligi bilan ham kongillarni rom etardi. Osha yuz minglab nusxada bosilgan kitoblarni oqigan millionlab kitobxon tutqunlik sehriga berilgan. Bu o'zi juda ham galati holat, alomat bir ommaviy kayfiyat ediki, hali uning sir-asrorlari tolig'icha tadqiq etilganicha yoq ham. Ammo masalaning boshqa tomoni bor: tutqunlikda tafakkur oqimi sekinlashi, tubga tushib ketishi, hattoki, tanazzulga uchrashi ham mumkindir, ammo erkinlikka chiqishi hamono o'zini o'zi tozalaydi, o'zini davolaydi, faoliyatdagi tafakkur – hamisha ham yaratuvchilikka qarab ketadi. Mana, qarang, hozir osha paytlari oqiganlarimizdan nima ta'sir qoldi? Ul-bul xotiralar, xolos. Korchaginning insoniy matonatini hurmat qilish mumkindir, lekin uning bol shevistik tuzumga sadoqatini emas. Har qalay, Pavel Vlasovdek bolishni orzu qiladiganlarning zamoni otib ketdi. Endi erkinlik bizga kelajakning boshqa talablarini qoymoqda.

*6. Televideniening jamiyatdagi ornini qanday baholaysiz?*

A.A.: Televideniedan ayri, uni ko'rmay yashash boshqacha bir qahramonlik bo'lib qoldi. Sahar turib, hali uyqungiz ochilmay TVni ochasiz – dunyo uyingizga kirib keladi. Otgan asrning boshida Lenin «San'atlar ichida eng muhimi – kino» degan, lekin bu gapning zamoni otib ketgan, chunki u paytlari TV kashf etilmagan,

kino - «harakatli fotografiya»ni bir vaqtning o'zida bir necha yuz odam ko'rishini mumkin bo'lgani uchun eng muhim hisoblangan. Hozirga kelib hamma san'at TVning o'zida, eng qamrovli, eng kuchli, eng ta'sirchan, xullas, eng, eng... TVning o'zi bo'lib qoldi. Uning chegarasi ham yo'q hisobi. Mana, masalan, mamlakatimiz axborot maydonida mingdan ortiq telekanalni tutish mumkin. Bu esa esa yangi muammolarni keltirib chiqarmoqda: axborot maydonimiz qancha ochiq va erkin bo'lsa, o'z televideniemizni shuncha ko'tarish. Ya'ni o'z maydonimizga o'zimiz egalik qilishimiz, TVda ham o'zligimizni ustivor darajada tutib turishimiz kerak bo'layotir. Bunda TVning ommabop-kongilochar dasturlari, xilma-xil shoulari va ayniqsa badiiy televizion filmlari asosiy ahamiyatga ega bo'ladi. Telekorsatuvlar til bilan bog'liq, boshqa tildagi dasturlarni tushunmagan odam kormaydi, ularni tarjima etish ham urf emas, ammo horijning badiiy, televizion filmlari, ayniqsa teleseriallari takalluf bilmaydi, reklama va boshqa, xususan mafkura manfaatlar borki, soramay kirib kelaveradi, chala-chulpa, yuvuqsiz tarjimalar bilan. Bugun bizning o'z televizion filmlarimiz bor, ammo kam, milliy teleserial masalasi halihanuz dolzarb. «O'zbekiston» telekanalida to'qqiz yil oldin birdaniga uchta: ellik qismli «Kongil ko'chalari», oltmish qismli «Charxpalak», yuz-yuz ellik qismli «Muhabbat mojarosi» teleseriallarini rejalashtirgan edik, shundan «Kongil ko'chalari» ssenariysini rahmatli Mashrab Boboiev yozdi, ellik ikki qism bo'lib, o'sha paytlari, yanglishmasam, MDH davlatlari orasida birinchi katta teleserial bo'lib, efirga uzatildi, «Charxpalak»ning ssenariysi, o'n ikkimi, o'n uchmi qismga kelganda to'xtab qoldi, boricha «O'zbektelefilm»da suratga olindi, uchinchisining dastlabki qismlari ssenariysi yozildi u-bu sabablar bilan siljmay qolaverdi. Keyin ham ikki, tort, olti, o'n qismli badiiy videofilmlar ham yaratildi, ammo efir uchun katta milliy teleserial yaratish muammosi kondalangligicha turibdi. Shu kunlarda «O'zbektelefilm»da yangi teleasarning yigirma qismi ustida ish boshlandiki, shoyad shu harakat katta serialni royobga chiqarishda bir po'gona bo'lsa. Aytmoqchimanki, TVning hayotimizdagi orni beqiyos, lekin bu ekranning badiiy boyligining katta salmo'gi o'zimizniki bo'lishi kerak, teletomoshabinlarimiz teleseriallarda ham o'z hayotlarini ko'rishni istaydilar. Yana bir jihati - bugungi kunda TVning hayotimizda tarbiyachilik orni ham bor, shundoq ekan ibrat namunalari ham o'zimizdan bo'lishi joiz.

### *7. Ijodkor uchun rahbarlik lavozimi o'g'ir emasmi?*

A.A.: Agar ijodingiz bilan rahbarlik ishingiz bitta soha bo'lsa, deylik, yozuvchi yo shoir badiiy jurnalni, jurnalist gazeta tahririyatini boshqarsa, jamoasi uncha katta bo'lmasa, balki o'g'irlik qilmas. Lekin TVda emas. Bu ohanrabosi shuncha kuchli, yugur-yugur, tashvishi shuncha kop, shunday yutib yuboradigan ishki, qochib-pisib, hikoya-pikoya yozarsiz, lekin romaningizni oylagan paytda sira yoza olmaysiz, yozsangiz ham yoza olmayotganingiz bilinib turadi. Kongildagidek chiqmaydi. Umuman, yozuvchi odam o'zini aldamay, yo rahbarlikni, yo ijodni tanlashi kerak, yo'q esa, ikkalasi ham chala qoladi. Endi ijod masalasida u-bu bahona bilan yozmay yurishingiz mumkindir, lekin rahbarlikda bunaqa bahonalarni

ishlata olmaysiz, chunki sizga tort tomondan qarab turadilarki, rahbarlikning «ijodi»ni qilishdan o'zga chorangiz qolmaydi. Aytish kerakki, bu «ijod»ning ham jozibasi bor, agar shu yukning bitta o'zini kotarib, berilib ishlasangiz. Ijodkor-rahbar do'stlarimning izhori dillarini aytsam, hammasi ham ishlarining o'g'ir yoki engilligidan qat'iy nazar, «Eh-h, qani edi vaqting bemalol bo'lsa-da, yozsang, yozaversang!», deb orzu qiladilar. O'zingiz xulosa chiqaravering.

#### 8. *Farzandlaringiz ham sizning yo'lingizni tanlaydimi?*

A.A.: Agar, deylik, ijodkor farzandining ijodkor bo'lib yo'lini davom ettirishini nazarda tutsak, men bu shart emas, hatto muayyan bir ma'noda noto'g'ri ham deb o'ylayman. Zor yozuvchining bolasi otasidan ham zor yozuvchi bo'lishi kamyob hodisa. Rassom haqida ham, kompozitor haqida ham, umuman iste'dod talab etadigan soha egalari haqida shu gapni aytish mumkin. Dunyoga mashhur qaysi adib yo shoirni olmang, ularning ota-onasining bu kasbga aloqasi juda kam. Tabiat farzandda ota-onani muayyan kasb bo'yicha emas, fe'l-atvori, intiluvchanligi, irodasi, umuman tiynati ma'nosida takrorlaydi. Kasb o'rgatiladi, organiladi. Ota-ona yo'li deganda men ko'proq oila muhiti an'analarini, axloq-odob tarbiyasi, muomala madaniyati qatorida, masalan, o'qishga, ilm olishga, umuman ma'rifatga intilishni nazarda tutaman. Shu ma'noda xudoga shukr qilaman, bolalarim liseyda o'qidi, o'g'lim Angliyadagi universitetni, qizim o'zimizning Iqtisodiyot universitetimizni bitirdi, shu ma'noda yo'limizni davom ettirdilar deyman, endi u-bu narsa yozish-chizishlariga kelsak, bu – ixtiyorning ishi, taqdirida bo'lsa, vaqti-soati kelib, ta'qiqlashingizga ham qaramaydi, yo'q esa dahoga shogird qilib qo'ysangiz ham befoyda. Ilm olishdan erinmasa, ziyoga intilsa bas, yaxshi farzand tutadigan yo'l shu o'zi.

#### 9. *O'qituvchilarga tilaklaringiz...*

A.A.: O'tgan yili menga «Xalq maorifi a'lochisi» degan nishon berildi. Ta'sirlandim, albatta «O'zbekiston» telekanalida maorif muammolarini yoritib boradigan xodimlarning mehnati uchun meni taqdirladilar, lekin universitet amaliyotlarini aytmasa, bir kun ham maktabda dars bermaganim uchun o'z vaqtida shunday nishon ololmay qolgan o'qituvchimning o'rniga olgandek bo'ldim. Qishloq o'qituvchisi uy-joyi, tagidagi mashinasi yo obro'si bilan maqtanmaydi, hozir shaharda yashayotgan yo katta rahbarlik lavozimlarida ishlayotgan o'quvchilari bilan faxrlanadi, shularni gapirganda ko'zlari quvonchga to'ladi, xuddi ularning o'rnida o'zi o'tirgandek, hammasining obro'-martabasi o'ziga berilgandek. Ustozlik sururi ham shu o'zi. Ona qishlo'gi, ota mahallasini tark etib qaysi-qaysi martabalarga ko'tarilgan kimki bor, hammasi o'qituvchining ana shu sururidan o'sib chiqqan. Shu surur hech qachon sonmasin! Chunki hamma buyuklik o'qituvchining kamtarligidan...

Sherzod Ahmadov suhbatlashdi  
2005 yil.